



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Mechlinia Illustrata Luce Miraculorum S. Francisci Xaverii
Orbis Utriusque Solis Ac Thaumaturgi Chronicis Distichis
evulgata Anno M.D.C.LXVI.**

Grumsel, Gérard

Mechliniae, 1666

Approbationes Miraculorum.

urn:nbn:de:hbz:466:1-13399

APPROBATIONES
MIRACULORUM

P. R. I. M. A

Andreas Dei & Apostolica Sedis gratiâ
Archiepiscopus Mechliniensis, &c. omnibus
has Visuris salutem in Domino.

Cum nuper approbaverimus sacras Reliquias de Brachio
dextero Sancti *Francisci Xaverii* Indiarum Apostoli,
easque publicæ venerationi exponendas esse decreverimus,
quò magis Dei cultus, qui in Sanctorum suorum honoribus
honoratur, caperet incrementum, usque rite & solemniter in
Templo R. R. Patrum *Societatis JESU* Collegii, & Domus
Probationis Mechliniensis expositis, tantâ in veneratione, tam
à populo Mechliniensis, quàm à circumjacentibus haberi cæptæ
sint, ut Divina Bonitas, quæ innumeris miraculis per varias mundi
plagas hunc Sanctum suum mirificavit, hanc etiam Christi
Fidelium devotionem variis signis & subitaneis curationibus
ostenderit sibi esse acceptam. Nos igitur, quibus nihil magis cordi
est, quàm ut honor Dei nostri, qui Zelotes est, in creaturis
suis erga Sanctos suos crescat, & incessabili gratiarum actione
laudetur, deputavimus è Capitulo nostro Metropolitico R. R. Ad-
mod. D. D. Confratres nostros *Dismam Corten* Cantorem, &
Franciscum vanden Driessche Archipresbyterum, J. U. Licentiatos
& Canonicos, qui juxta SS. Canones & Sacrosancti Concilii
Tridentini formam, examinarent sollicitè omnia, quæ ad nos
miraculosè accidisse indies delata sunt. Quibus discussis, & exa-
minatis informationibus Medicorum, & testium depositionibus
in approbandis Miraculis adhiberi solitis (ex quibus constat &
liquet *Joannem Gommaert*) Juvenem octodecim annorum à gra-
vissima

vissimâ Phrenitide, & morbo furioso, matre ejus *Sarâ Diffon* ad Sacras Sancti *Francisci Xaverii* Reliquias pro filio suo votum faciente, precesque fundente, subitanè & perfectè curatum esse: Item *Annam van Bael* ætatis annorum septemdecim, dum ad dictas S. Reliquias per *Novenani* preces fundit & votum, sinistra oëuli triennali cœcitate curatam, & ex dextero, qui propemodum ex duobus floccis, seu pelliculis illi incumbentibus omni potentiâ visivâ destitutus erat, planè sanatam, ut utrâque oculorum acie ab eo tempore perfectè utatur) Nos de virorum gravium consilio & assensu, in Dei nomine, utramque istam in dictis *Joanne Gommaerts*, & *Anna van Bael* curationem, prout latius in dictis informationibus probata est, supernaturalem, & non nisi Divinâ virtute & Miraculo factam esse, & Sancti *Francisci Xaverii* intercessioni adscribi posse declaravimus, (in puncto trium calculorum nostrorum felicitatis sectionis, quam etiam magni illius Sancti intercessioni summâ fiduciâ commendaveramus) & declaramus per præsentem: Exhortantes omnes Christi fideles ad sacram dictarum Reliquiarum venerationem & cultum, ut per intercessionem S. *Xaverii* tam à mentis, quàm à corporis infirmitatibus in Domino mereantur liberari.

Datum Bruxellæ in Aula nostra Archiepiscopali sub nostris signatura & sigillo die 10. Mensis Maii, Anno Domini M. DC. LX.

Locus † sigilli.

Andreas Archiepiscopus Mechliniensis.

Q. 2

SE-

ANDREAS Dei & Apostolicæ Sedis gratia Archiepiscopus Mechliniensis &c. Omnibus has visuris salutem in Domino.

CUM juxta commissionem nostram jam pridem datam Reverendis admodum Dominis Dismæ Corten Cantori & Francisco vanden Drielsche Archipresbytero Ecclesiæ nostræ Metropolitanæ Canonici, super inquisitione faciendâ de portentosis sanationibus factis in personis, quæ recursum suum cum fiducia habuerunt ad Sanctas Reliquias S. Francisci Xaverii per approbationem nostram expositas fidelium venerationi in templo Societatis JESU Mechliniæ: quodque iidem Domini sedulâ diligentia & industriâ commissioni nostræ incumbentes, nobis varia legalia, & omni prorsus fraude carentia exhibuerunt, ex quibus patent & probata sunt sequentia: Quod Joannes de Regere Mechliniensis septennis filius Martini toto corpore ulceribus plenus & pure fluentibus, dum pro eo parentes & amici vota serunt, Novenamque devotè instituunt ante dictas Reliquias, dictæ Novenæ tempore nullis adhibitis medicamentis, quæ antea sæpius in vanum fuerant adhibita, perfectè & purissimè fuerit sanatus; Item quod Renerus Tys villicus in Wavriâ S. Catharinæ, qui spatio novem annorum utramque tibiam habuerat ulceribus tabe fluentibus plenam, voto facto invisendi dictas Sanctas Reliquias spatio octo dierum perfectissimè fuerit sanatus, ita ut ne quidem cicatrices apparerent; denique quod Jacoba van Binnebeeck ætatis 35. annorum fuerit gravissimè intoxicata & variis morbis afflicta per spatium quatuor annorum, ita ut sæpius evomuerit magnam quantitatem crinium in formam globorum implicatorum, atque etiam clavos ferreos tam magnos, quam parvos, aciculas, capillos, uncos, & notabilem hamum piscis, & alia id genus: quare à diversis Religiosis sæpius fuerit exorcisata, sed in vanum; tandem post osculatas tribus distinctis diebus per eandem dictas Reliquias ab omni morbo & intoxicatione perfectissimè fuerit eodem tempore sanata.

Quas

Quas quidem subitas & mirabiles sanationes diligenti per nos facto examine in talibus adhiberi solito, tenore presentium declaramus supernaturales, & miraculis adscribimus, & ut tales volumus publicari, ut Christi Fideles excitentur ad devotas preces fundendas Divinae Bonitati, quae per intercessionem magni illius Indiarum Apostoli Sancti FRANCISCI XAVERII talia signa & dona desuper elargiri dignata est: ut quod in tribus hisce personis accidisse & miramur & veneramur, etiam in omnibus necessitatibus nostris eundem apud Majestatem Divinam habeamus patronum. In quorum fidem praesentes signaturam & sigillo nostris munitas dedimus.

Mechliniae die quartâ Mensis Novembris
Anno Domini. M. DC. LX.

Locus † Sigilli.

Andreas Archiepiscopus Mechliniensis

T E R T I A.

ANDREAS Dei & Apostolicae Sedis gratia Archiepiscopus Mechliniensis &c. Omnibus has visuris salutem in Domino.

Quemadmodum inter varias urbes, quae sacras Sancti FRANCISCI XAVERII colunt Reliquias; imprimis in Belgio eminet Mechlinia Diocesanos nostrae sedes, ubi primum illae Nobis approbantibus publica venerationi in templo Societatis JESU fuere expositae: ita ad plura & illustriora conferenda beneficia, per miraculosum & beneficium brachium Servi sui, ibidem indies Divina Manus sese extendit. Nam praeter ea, quae à nobis & aliis Ecclesiae Praesulibus mature examinata atque ritè antehac approbata sunt beneficia ac miracula; intelleximus non ita pridem, gloriosum illum Indiarum Apostolum fecisse iterum prodigiosam sanè potentiam in
brachio

brachio suo. Quod ut certius nobis & omnibus constet, hisce notum facimus, accuratè inquire jussisse nos in subitam, hodieque perseverantem sanationem à novennali Herniâ, quam prædicti Sancti beneficio civis quidam Mechliniensis impetravit, uti ex consequente authenticâ narratione ad nos transmissâ fit manifestum.

Guilielmus Ploegaerts ætatis annum agens quintum supra septuagesimum, novem omnino annos gravissimis Herniæ intestinalis cruciatibus afflictus fuit, extuberante sæpius malo ad magnitudinem infantilis capitis. Hujus rei oculata testis est *Margareta de Hooch Guilielmi* conjux: & præterea *Ludovicus van Bael*, qui non semel juratus deposuit, se prædictum *Guilielmum* præ dolore in mœnibus prostratum, & procedere non valentem, manu suâ admotâ, ita affectum, paucis, antequam sanatus est, diebus deprehendisse. Quem etiam à quatuor, aut quinque retro annis, quibus cum eo laboravit, non raro animadvertit ex eo malo ab opere desistere debuisse.

Fecerat enim virum morbi vis jam ab initio laboribus planè imparem accrescentibus in dies doloribus. Adeo vehementer, potissimum eâ nocte, quæ undecimam mensis Decembris diem Anno 1662. subsecuta est, cruciatus fuit, ut sibi supremam horam propius instare persuaderet: protestatus beneficii loco habiturum se, si violentâ licet morte, miserabilem clauderet vitam. Inter vicinos lamentantis ejulatibus somno excitatos, filia quædam, sub horam à media nocte primam, in levamen ægri, & ipso quidem incipio, votum fecit S. FRANCISCO XAVERIO Mechliniæ ad miraculosa ejus Lipsana perfolvendum. Facto voto cessat audiri omnis omnino ægri lamentatio. Primo mane adit *Guilielmi* domum vicina, percunctatur qui valeat: respondet *Magdalena Guilielmi* filia, jam inde ab hora noctis prima hucusque levi somno obdormiscere. Tum verò vicina: at, inquit, hâc ipsâ noctis horâ in solatium parentis tui magno illi Indiarum Apostolo FRANCISCO XAVERIO votum emisit, quod protinus perfolvam. Jam inde à concepto illo perfolutoque voto, ad hodiernam usque diem perstat *Guilielmo* perfecta curatio: nec ullum prorsus interea temporis, quod duos jam annos complectitur, ex antiquo malo dolorem

rem

rem sensit: incessit, peregrè profectus est, laboravit eâ facilitate ac si nunquam ullis Herniæ cruciatibus affectus fuisset. Quin imò vir id ætatis, primâ Maii Anni 1663. à recuperata valetudine mense sexto, *Mechliniâ Antverpiam* sarcinâ onustus. uno eodemque die, pedes pervenit, alacerque reversus est. Deinde inter ardentissimos solis æstivi calores rursus *Mechliniâ Bruxellam* unius diei spatio ivit rediitque sanus & incolumis. Testatur præterea *Guilielmus* duobus ab obtenta sanitate annis sese consuetae artis suæ, quam profitetur, laboribus sane difficilibus, (olior enim est) citra ullum doloris sensum strenuè perfunctum esse, fodisse, semina terræ mandasse, humido frigidoque solo, horti sui excolendi gratiâ ad multas horas incubuisse, & cœtera ejusmodi laboriosa opera fecisse, quæ Herniæ malo maximè adversari experientia edocet. Item plantasse, loco suo dimovisse, ascendisse arbores, & quidem nuperâ ætate ex una earum justæ magnitudinis casu in terram corruisse, nullo prorsus antiqui mali apparente indicio. Quamvis antea, totis novem, quibus eo afflictus fuerat, annis, tum potissimum, cum aut cœlum humidius, ac frigidius esset, aut artis suæ laboribus non nihil intendisset, ingenti doloris sensu, continuo è corpore erumperet, ingravesceretque.

Posteaquam ad aures nostras à pluribus viris fide dignis hæc omnia pervenissent; de iis per Reverendos admodum Dominos Antonium Vermeulen S. Theologiæ Licentiatum & Ecclesiæ nostræ Metropolitanæ Canonicum graduatum; & Joannem Baptistam Bernartium ejusdem Ecclesiæ Plebanum ac Canonicum, Commissarios ad hoc deputatos ex nostro mandato, captæ sunt de singulis informationes, in forma legitima: quibus prædictus *Guilielmus* ejusque uxor, ac filia & *Ludovicus van Dael* jurati subscripsere; quasque iidem R. R. DD. Commissarii suâ manu firmarunt, & ad nos transmiserunt. Accesserunt præterea multiplicia nominatissimorum Medicorum testimonia, *Mechliniensium, Antverpiensium, Bruxellensium, & duorum primariorum Medicinæ Professorum ac Doctorum in celeberrima Academia Lovaniensi*: qui pari omnes consensu attestantur, ejusdem subitam ac constantem à novennali Hernia liberationem in viro 75. annorum, supra naturæ vires esse. Quibus auditis & coram Deo maturè expensis

pensis, nec non super eo etiam Theologorum & aliorum doctorum
virorum habito consilio juxta modum in approbatione novorum Mira-
culorum à Concilio Tridentino præscriptum: conformantes nos R.R.
D.D. Commissariorum sententia; qui maturè & accuratè omnia ex-
aminarunt, & appenderunt: decernendum duximus, prout per præ-
sentes decernimus, posse & debere dictam Guilielmi sanationem mi-
raculosam, & per merita S. FRANCISCI XAVERII à Deo factam
& impetratam censeri, & publicari, & ut talem publicamus, ac
decernimus. In quorum fidem hæc manu & sigillo nostris muni-
tas per Secretarium nostrum expediri jussimus: Deum qui glorifican-
tes se glorificat, & in Sanctorum suorum honoribus honoratur, hu-
militer deprecantes, ut sicut Beati FRANCISCI XAVERII
gloriosa merita ac beneficia experti & venerabundi agnoscimus; ita
ejus pia patrocina deinceps sæpius sentiamus.

Datum Bruxellis, die
23. Mensis Novemb.
Anno Domini 1664.

Locus † sigilli.

Andreas Archiepif. Mechliniensis

Judocus Houbraken Ecclesiæ Cath. Antverpiensis Canonicus, & Episcopatus Sylvæducensis vacantis Vicarius generalis Omnibus has visuris salutē in Domino.

Inter indubitata veræ Ecclesiæ signa, miracula sunt, in infidelium ad fidem conversionem, & fidelium in eadem confirmationem quandoque patrari solita. Eximie iis claruit in vita, & post mortem S. FRANCISCUS XAVERIUS è Societate JESU Indiarum, ac Japoniarum gloriosus Apostolus, quem miraculosum, ac beneficium Brachium suum, cujus particula aliqua Mechliniæ in templo Societatis JESU publicæ venerationi est exposita, etiam ad subditos nostros extendisse intelleximus. Quod ut certius constet, hisce testatum facimus, segillatim inquisivisse nos, & inquiri curasse in liberationem à maligna febre, subitamque virium instaurationem, quam ejus beneficio filia quædam in Diocesi nostra Sylvæducensi, hoc, qui subjungitur, modo est consecuta.

Cum Anno 1662. Bredæ pestis grassaretur, laboranti illic fratri adstitit N. N. Villica è territorio Sylvæducensi. Domum rediit, & ipsa cœpit Malignâ febre laborare, & maritum, filios duos, ac filiam Catharinam 22. annos natam infecit. Matre primum, ac mox Patre malignitate morbi sublatis, & fratribus subinde eadem correptis, Catharina inde à 26. die Julii usque ad 23. Augusti ita continuatis ejusdem ardoribus est exhausta, ut viribus, ac mente tandem etiam destituta, cum nullum superesset in arte remedium, vitæ ulterioris spem denegarit expertus Chirurgus, qui scripto hæc, quæ narramus, inter alios juratus iteratò confirmavit. Indubitata opinio erat inter amicos, ac vicinos pestiferâ lue domum infectam. Non erat itaque, qui solatium ægris, qui necessarium obsequium præstaret. Non deseruit tamen desertos ab omnibus suis Pastor confusus per merita, & intercessionem S. FRANCISCI XAVERII, & ægros liberandos à morbo, & se à contagione servandum. Cum ergo Catharinam sub seram vesperam sacrâ unctione munivisset, eodem vespere regressus S. FRANCISCI XAVERII imaginem atulit, quæ sacris ejus Reliquias Mechliniæ

R

Mira-

Miraculis claras attigerat, & *Catharina* maximiè periclitanti per fratrem offerens, omnes ad fiduciam in Sancti illius intercessione apud Deum locandam excitavit. Jam quartum, quintumve diem jacuerat *Catharina* impotens se movère, oblatam imaginem arripuit, & osculta est magnâ cum fiduciâ, quam ut porrò per noctem foveret Pastor adhortatus, domum se recepit. Insequente die bene mane, nemine opitulante, nemine conscio vestibus se suis induit, lecto eripuit *Catharina*, & ædes inambulavit. Quin & in campum illo ipso die egressura fuit, pabulumque jumentis quæsitura, nî fratres continuissent: postridie reipsâ quæsivit: cumque D. Pastor ædes interea ingressus vel mortuam vel animam agentem in lecto quærir adest illa ad fores ingenti onusta corbe, pabulumque in agro collectum infert. Hæsit attonitus Beneficii novitate D. Pastor: mox increpuit, quòd tam temerè cæli se, solisque injuriis, ac recidivæ periculo commisisset; fidenter illa: sollicitudinem mitte, inquit, nihil periculi subest, ab hesterno mane me Sanctus ille perfanavit, ac viribus restituit.

Hæc omnia cum ad nos fuissent in legitimo instrumento delata: cui D. Pastor, ipsa Catharina, Chirurgus, fratres duo, alique consanguinei, & vicini jurati subscripserant: constituimus primùm Commissarium in partibus illis virum probum, & intelligentem, qui postquam in omnia nostro nomine inquisivit, iteratoque, interpositâ jurissurandi fide, eadem ex Catharina intellexit, omnia suâ etiam signaturâ firmavit: deinde nos ipsi coram hîc Antverpiæ prædictam Catharinam in præsentia sui Pastoris omnium conscii examinavimus, & sub eâdem religione sic omnia accidisse comperimus. Quibus compertis cum etiam nobis submissa scripto fuissent expertissimorum Medicorum Judicia, hæc super re consultorum, Tungrensis, Bruxellensis, ac præsertim duorum primariorum Doctorum, ac Medicinæ Professorum, aliorumque duorum celeberrimæ Academiæ Lovaniensis unanimiter consentium, istam virium restaurationem naturæ vi tam exiguo temporis spatio obtineri non potuisse; ut nihil non ritè, ac juxta Concilii Tridentini placita perageremus, viros doctos ac Theologiæ peritos consulimus, ac coram, & cum iis iterum prædictam Catharinam audivimus, omnibusque tandem co-
tam

ram Deo maturè consideratis, decernendum post longam, & sæpius iteratam inquisitionem putavimus, prout per præsentés decernimus, posse dictæ Catharinæ sanationem tamquam miraculosam, & per merita Sancti FRANCISCI XAVERII à Deo factam, & impetratam censeri, & publicari; & ut talem publicamus & censere nos testamur: Auctorem omnium Deum rogantes, ut sicut Indiarum gentes Sancti FRANCISCI XAVERII dum vixit, prædicatione, & Miraculis Ecclesiæ suæ aggregare voluit, ita modo hisce in partibus ejusdem Miraculis, & intercessione fideles populos velit in eadem conservare, & confirmare; eosque, qui quovis errore ab eâ segregati sunt, ad eandem benignè reducere. In horum omnium fidem hæc manu propriâ signavi, & Vicariatus nostri sigillo muniri curavi. Die XIX. Mensis Martii, Anno Domini 1664.

Locus * Sigilli.

J. HOEBRAKEN

APPROBATIONES BENEFICIORUM

§. I.

ANDREAS Dei, & Apostolicæ sedis gratiâ Archiepiscopus Mechliniensis Omnibus has visuris salutem in Domino. Cum in dies clarescant plura, ac plura Beneficia quæ divina manus largè conferre dignoscitur ad sacras Reliquias de Brachio dextero magni Indiarum Apostoli S. FRANCISCI XAVERII in templo Societatis JESU Mechliniæ fidelium venerationi, nobis approbantibus expositas, de iisque per Revend. Admodum Dominos Commissarios ad hoc deputatos legitime sint captæ informationes: Nos per eos debite informati (quamquam non dubitent quin complura Miraculis à nobis merito adscribi posse viderentur) maturiori adhuc examini illa cum aliis reservantes neque certi quidquam in præsentiarum decernentes, vulgari typis omnia dumtaxat permittimus, in fide bonâ eorum, qui se à S. FRANCISCO XAVERIO accepisse apud suprascriptos Reverendos Admodum Dominos Commissarios legitime deposuere, ut videant omnes non esse abbreviatam manum Domini, quin salvare possit, etiam in particula Brachii Servi sui: adeoque incitentur ad divinam ejus misericordiam per Sancti sui intercessionem ferventiùs implorandam, & feliciùs consequendam. Datum Mechliniæ die decimâ sextâ Mensis Februarii, Anno Domini 1662.

Locus * Sigilli.

ANDREAS Archiepiscopus Mechliniensis